

Toghchán na huachtaránachta

Ceist 1 Beidh tú ag féachaint ar ball ar thuairisc faoi thoghchán uachtaránachta na Stát Aontaithe. Sula bhféachfaidh tú ar an mír, pléigh a bhfuil ar eolas agat faoin scéal leis an duine in aice leat.



Ceist 2 Cén Ghaeilge atá ar na focail agus ar na frásaí seo thíos? Beidh siad le cloisteáil sa mhír ar ball.

- the last day of campaigning
- ahead of
- in the national polls
- his opponent
- the decisive states (swing states)
- predicting
- threatening
- percentage
- this time
- still to be counted

Féach ar an mír den chéad uair, le feiceáil an raibh an ceart agat.

Ceist 3 Anois, féach ar an tuairisc arís agus pléigh na ceisteanna seo leis an duine in aice leat:

Sa mhír	Anois
1. Cé atá chun tosaigh sna stáit chinniúnacha áirithe?	1. Cé a bhuaigh nó cé atá chun tosaigh anois sna stáit sin?
2. Cén fáth ar luadh Florida agus Pennsylvania sa mhír?	2. Cad atá sa nuacht faoi na stáit sin anois?
3. Cé mhéad duine a chaith	3. Cé mhéad duine a chaith

vóta de réir na míre? 4. Cé a bhuafaidh an toghchán, de réir Sheáin Federico Uí Murchú?	vóta faoi dheireadh Dé Céadaoin? 4. Cé a bhuaigh an toghchán?
--	--

Ceist 4

Bíonn an tuiseal ginideach i gceist ar 5 chúis. Léigh na cúiseanna agus na samplaí thíos agus bí ag obair leis an duine in aice leat chun (1) sampla amháin de gach cúis a aimsiú sa mhír agus (2) samplaí eile de na cúiseanna ar fad a chur i láthair.

Cúis 1: dhá ainmfhocal i ndiaidh a chéile, e.g. vótáil → bothán vótála

Sampla ón mír: _____
Sampla eile: _____

Cúis 2: tar éis ainm bhriathartha, e.g. obair → ag cuardach oibre

Sampla ón mír: _____
Sampla eile: _____

Cúis 3: tar éis réamhfocail chomhshuite, e.g. an teach → ar fud an tí

Sampla ón mír: _____
Sampla eile: _____

Cúis 4: tar éis réamhfocail áirithe, e.g. an tír → timpeall na tíre

Sampla ón mír: _____
Sampla eile: _____

Cúis 5: tar éis focail a chuireann cainníocht ghinearálta in iúl, e.g. rís → a lán ríse

Sampla ón mír: _____
Sampla eile: _____

Ceist 5

‘...**ar feadh** cúpla lá...’ agus ‘...**go ceann** roinnt laethanta...’

Cuir na focail seo, a chuireann tréimhsí ama in iúl, in abairtí lena mbrí a léiriú:

- ar feadh
- go ceann
- i gceann
- le

Ceist 6

Pléigh na ceistanna thíos leis na daoine eile i do ghrúpa:

1. An raibh tú sásta le toradh an toghcháin? Cén fáth?

VIFAX 05 Samhain 2020

Ardleibhéal

2. An gcuireann toradh thoghchán na huachtaránachta sna Stáit Aontaithe isteach go pearsanta ar do shaol féin? Mínigh.
3. Cad atá i ndán do Stáit Aontaithe Mheiriceá anois?

Treoracha agus Freagraí

Ceist 1

Is féidir gach beirt a chur ag plé na ceiste seo sula seinntear an tuairisc.

Ceist 2

Is féidir an stór focal seo a phlé tar éis féachaint amháin.

the last day of campaigning – *an lá deireanach stocaireachta*

ahead of – *chun cinn ar*

in the national polls – *sna pobalbhreitheanna náisiúnta*

his opponent – *a chéile comhraic*

the decisive states (swing states) – *na stáit chinniúnacha*

predicting – *ag tuar*

threatening – *ag bagairt*

percentage – *céatadán*

this time – *an turas seo*

still to be counted – *fós le comhaireamh*

Ceist 3

Sa mhír	Anois
Féach an script.	Cuir an méid a thit amach tar éis an toghcháin i gcomparáid leis an méid a luadh sa script.

Ceist 4

Cúis 1: dhá ainmfhocal i ndiaidh a chéile, e.g. vótáil → bothán vótála

Sampla ón mír: *i dtoghchán na huachtaránachta*

Sampla eile: *an seomra ranga*

Cúis 2: tar éis ainm bhriathartha, e.g. obair → ag cuardach oibre

Sampla ón mír: *ag tabhairt cuairte*

Sampla eile: *ag ithe feola*

Cúis 3: tar éis réamhfocail chomhshuite, e.g. an teach → ar fud an tí

Sampla ón mír: *de réir na bpobalbhreitheanna*

Sampla eile: *i gceann míosa*

Cúis 4: tar éis réamhfocail áirithe, e.g. an tír → timpeall na tíre

Sampla ón mír: *chun tosaigh*

Sampla eile: *timpeall na cruinne*

Cúis 5: tar éis focail a chuireann cainníocht ghinearálta in iúl, e.g. rís → a lán ríse

Sampla ón mír: *an-chuid ama*

Sampla eile: *an iomarca cáise*

Ceist 5

Ar feadh: Bhí mé sa Fhrainc ar feadh míosa. / Beidh mé san Iodáil ar feadh dhá lá.

Go ceann: Ní bheidh sí anseo go ceann uair an chloig eile.

I gceann: Beidh mé ar ais i gceann seachtaine.

Le: Tá mé anseo le coicís.

Ceist 6

Tabhair deis do gach grúpa na ceisteanna a phlé ina n-aonar ar dtús, sula bpléifidh tusa na ceisteanna leis an rang iomlán.

Eimear Ní Chonaola

Inniu an lá deireanach stocaireachta i Stáit Aontaithe Mheiriceá roimh lá na vótála amárach i dtoghchán na huachtaránachta. Cé go bhfuil Joe Biden fós chun cinn ar an Uachtarán, Donald Trump, sna pobalbhreitheanna náisiúnta, is beag atá idir iad, is cosúil, i gcuid de na stáit is cinniúnaí sa toghchán.

Eibhlín Ní Choistealbha

An lá deireanach stocaireachta i dtoghchán na huachtaránachta – an tUachtarán Trump ag tabhairt cuairte ar chúig stát chinniúnacha, ina measc North Carolina, Michigan, Wisconsin agus Pennsylvania. A chéile comhraic, Joe Biden, in Ohio agus Pennsylvania. Lady Gaga tugtha isteach aige in Pittsburgh, in iarracht daoine a mhealladh chun vóta a chaitheamh dó.

De réir na bpobalbhreitheanna náisiúnta, tá Biden chun tosaigh go maith ar an Uachtarán. Ach, tá an iomaíocht i bhfad níos géire i roinnt de na stáit chinniúnacha. Tá an-bhéim ar Pennsylvania anois – stát a thug Donald Trump leis in 2016. Ach, tá pobalbhreitheanna ag tuar go bhfuil Biden ag bagairt na vótaí sin a bhaint de, do na Daonlathaigh.

Seán Federico Ó Murchú, Iriseoir, Nua-Eabhrac

Is é an rud faoin toghchán sna Stáit Aontaithe ná go mbraitheann sé ar stáit áirithe, ní ar an bpobal go ginearálta. Sa chás seo, i mbliana go háirithe, tá an-chuid daoine ag faire ar Florida mar bíonn Florida tábhachtach gach aon uair, agus i mbliana ar Pennsylvania. Sin stát dúiche Joe Biden agus do ba é an stát a bhuaigh Donald Trump le céatadán an-bheag¹ den vóta ceithre bliana ó shin agus sin é an stát ina bhfuil Biden ag caitheamh an-chuid ama de bharr go dteastaíonn ó na Daonlathaigh é sin a bhuanachan mar measann siad gurb é sin...gur trí Pennsylvania a rachaidh siad go dtí an Tigh Bán.

Is dócha go mbuafaidh Joe Biden an turas seo ach ní Ach seans nach bhfaighimid amach ar feadh cúpla lá, ar a laghad.

Eibhlín Ní Choistealbha

Tá breis is 90 milliún Meiriceánach tar éis vóta a chaitheamh cheana féin ag an toghchán uachtaránachta. Níltear ag súil le toradh cinnte istoíche amárach, áfach, agus vótaí a seoladh sa phost fós le comhaireamh go ceann roinnt laethanta.

Eibhlín Ní Choistealbha, Nuacht TG4

¹ *an-bheagán* a dúradh